

Cifras negativas tar las pendicularas grischunas

■ (rtr) Entant che l'hotellaria ha pir publicità las cifras dal schaner na laschan supponer las cifras da las pendicularas grischunas nagut da bun: las pendicularas han communitgà en lur monitoring dad avair transportà en favrer 2016 8,4% pli paucs giasts ch'anc en favrer 2015.

Aura ed euro èn responsabels

Era tar las pendicularas è il regress marcant. Las raschuns sajan evidentas, scrivan las pendicularas.

Il svilup da las cifras en favrer mussia cleramain ch'ils giasts da la zona da l'euro manchian, scrivan las pendicularas: «Per fortuna èn ils giasts svizzers fidaivels al Grischun.»

L'aura saja stada enfin la fin da december memia sitga e chauda, suenter memia variada e chauda. La stagiun d'enviern actuala è per 2,6 grads pli

chauda ch'en media ed uschia la stagiun la segund-chauda dapi che las temperaturas vegnan mesiradas.

Il trend negativ na sa laschia betg pli fermar

L'aura dal schaner e favrer ha fatg in stritg tras il quint da las pendicularas grischunas per pudair prender suenter in zic las perditas sur Nadal e Bumaun. Dapi l'entschatta da la stagiun fin la fin da favrer è quai ina reduziun da passa 13%. Tenor il monitoring quintan las pendicularas per la fin da quest enviern cun perditas da 10 fin 15%, en cas singuls era cun anc dapli. Cundiziuns da rom, che sajan dad acceptar uschia, concluda il monitor.

Il monitor da las pendicularas grischunas cumpiglia cun 22 pendicularas radund 90% da la svieuta da transport grischuna.



Ils giasts mancan – grondas perditas era tar las pendicularas grischunas.